

## Referencial dels ensenhaires a Calandreta

*D'autres estatuts essencials pel movement son pas presentats aquí.*

*Aqueste referencial concernís sonque las personas que son en situacion d'ensenhamant davant de calandrons. : cap d'establiments, delegats, referents de formacion contunha.*

*D'associatius elegits (parents, regents de las federacions, Confederacion Calandreta, Conselh Scientific) an lor plaça dins los luòcs de decisions de la formacion dels regents. Las coordinatrises e ligaires fan part tanben dels dispositius.*

### Novelari

Una federacion li fisa una classa Calandreta per una durada limitada.

- A pas endralhat la formacion a Calandreta,
- Respècta la carta Calandreta,
- Participa als conselhs regents,
- Deu seguir las jornadas de recampament que li son prepausadas,
- Pòt participar als acamps de cicles,
- Pòt participar al congrès e a la jornada pedagogica confederala,
- Pòt participar al C.A. de l'escòla,
- Pòt participar a las activitats de l'associacion.

D'unes novelaris an seguit una formacion (AFPR).

A cada novelari prepausam de se marcar a la jurada qu'es lo sol biais per venir regent de Calandreta.

### Aprene 1

A capitat la jurada. A al mens lo nivèl A2 en occitan en debuta d'annada.

- S'endralha sul doble camin pedagogic e lingüistic,
- Viu l'annada de formacion Aprene 1 (cf Vademecum sul sit d'APRENE),
- Signa la Carta Calandreta, e s'engatja a la metre en òbra.

# **Referencial dels estatuts de regents**

## **Regent Aprene 2**

A validat l'annada Aprene 1. A lo nivèl B2 en lenga occitana.

- D'ara enlà participa al congrès e als acamps del movement Calandreta,
- Aquel estatut pòt durar 3 ans,
- Respècta los luòcs de paraula e sas règlas, n'aplica las decisions,
- Es implicat dins la vida associativa de l'escòla.

## **Regent adralhat**

A validat l'annada Aprene 2. A lo nivèl C1 en lenga occitana.<sup>1</sup>

- Pòt anar al concors [Master 2] amb lo fuòc verd de la Federacion regionala que ne fa part, o de la Confederacion.
- Pren sa part dins los luòcs s'associar per far escòla.

## **Professor d'Escòla Estagiari (PEE)**

A capitat lo concors CRPE.

- Viu la darrièra annada de formacion iniciala,
- Deu validar lo nivèl C1 en lenga occitana s'es pas encara lo cas<sup>2</sup>,
- Complís amb las demandas del plan de formacion.

## **Regent**

A capitat son annada PEE.

- Practica la lenga occitana d'un biais avisat, n'es portaire dins e fòra l'escòla, cèrca de la melhorar de longa. Contunha lo camin de lenga.
- Pren en responsabilitat una classa de quin cicle que siá, alestís la relacion als parents,
- Aplica la carta Calandreta e la pòt explicar als parents e autres,
- Camina pedagogicament, s'implica per de formacions continuas.

---

1 Dempuèi setembre de 2017, la capitada al C1 fa part del dispositiu de validacion de l'annada Aprene 2.  
Cf dispositiu Aprene2 sul sit d'APRENE

2 Concernís los regents que commenceron la formacion iniciala abans setembre de 2017.

## Lo Baile

Es un regent investit dins la formacion APRENE :

- Aculhís un calandrin dins sa classa (cf tèxt *Acuèlh d'un calandrin*), l'acompanha temps de las quatre o cinc setmanas de son modul,
- Pren de temps per l'escotar e respondre a sas questions de mercé un luòc de regulacion identificat,
- Ajuda lo calandrin per avançar sul camin de melhoraça de la lenga,
- Li demanda de preparacions escrichas, e las agacha. Aconselha,
- Balha son vejaire al calandrin per que melhore sa practica de classa. Li ditz çò que va plan, çò que cal melhorar o sustot çò que cal cambiar de sa practica de classa,
- Lo baile verifica se lo calandrin emplena regularament son quasèrn de bòrd (qu'es l'esplech tecnic), lo consulta, fa resson e balha lo fuòc verd per la mesa en òbra dins la classa,
- Sap escriure tan çò que va plan que çò que va pas,
- Participa a la formacion « Baile »,
- Escàmbia amb lo paissèl, a la fin manda la grilha al paissèl e ne parlan. Verifica que lo calandrin aja picat la tièra de las sesilhas menadas en classa. Clava puèi la grilha, la mòstra e la comenta al calandrin,
- En cas de dificultat, lo baile se pòt sarrar del paissèl del calandrin o d'un paissèl ajudaire.

## L'Espatlaire

- Es un Professor de las Escòlas marcat coma referent pel calandrin qu'acompanha del temps de sa responsabilitat dins la classa d'un Paissèl Ajudaire o Acompanhaire,
- Es un recors. Pòt passar dins la classa per ajudar e discutir,
- Pren la responsabilitat pedagogica de la menada de la classa en cas d'urgéncia,
- Fa resson al retorn del Paissèl Ajudaire o Acompanhaire,

# Lo Paissèl

## Faguèt de Baile.

- Es una referéncia per la lenga occitana e a lo lagui que lo calandrin la melhore long de son annada,
- S'engatja a participar d'un biais fèrm als conselhs de paissèls, luòc de validacion dels moduls,
- Seguís lo calandrin tot al long de l'annada,
- Es disponible per li parlar, quitament al telefòn,
- Li sap dire las causas malaisidas,
- A demostrat que coneis e respècta menimosament los luòcs de paraula,
- A accès al portfolio de son calandrin, dins l'ENT d'APRENE. Lo consulta e li fa resson.

# Lo Paissèl Acompanhaire

## Faguèt de Paissèl

- A d'experiéncia de la classa : es titular e ensenha dempuèi d' annadas,
- Sap reçaupre un calandrin dins sa classa. Sap ajudar un calandrin. Ne saupèt parlar en conselh de paissèls, prigondament e finament, en tot respectar la persona,
- Aculhís un calandrin per doas setmanas d'abaudiment e per 6 setmanas de responsabilitat acompanhada,
- Participa a las formacions Paissèls Ajudaires,
- Fa de visitas amb un paissèl-ajudaire, establisson a cada còp una grilha escricha,
- Participa a la *represa pedagogica* e signa (al cap d'un a tres ans) un tèxt eissit d'una elaboracion collectiva (cf tèxt Paissèl Acompanhaire),
- Pren en carga pauc a cha pauc de responsabilitats dins la còla de PA,
- Coneis mai d'una Calandreta, escàmbia a prepaus de sa practica de classa,
- Parla al nom d'APRENE.

# Lo Paissèl-ajudaire

## Faguèt de paissèl accompanhaire

- Es portaire de l'occitan, n'a lo lagui e lo vòl qualitatós dins totes los espacis d'expression de Calandreta (CA, Comissions, ...),
- Es obrador del projècte Calandreta,
- Participa a l'organizacion e a l'animacion del congrès,
- Participa a la concepcion de la formacion iniciala,
- Respècta e fa respectar los luòcs quand fa mestèr,
- Participa a las formacions de paissèls ajudaires, capita de parlar de sas practicas de classa,
- Fa de visitas de classa, capita de redigir los relats, amb respècte mas en saupre formular çò que va e çò que va pas,
- a de responsabilitats pedagogicas dins l'encastre de la formacion iniciala o continua (mestiers PA),
- Escriu articles, tèxtes o monografias a prepaus de la classa.